

Menningar- og ferðamálasvið f.h. Reykjavíkurborgar kt. 530269-7609 og Caput tónlistarhópur, kt. 491188-1629, gera með sér svofelldan:

SAMSTARFSSAMNING

um fjárstuðning Reykjavíkurborgar við Caput tónlistarhóp á tímabilinu 1. janúar 2021 til 31. desember 2023.

1. gr. Markmið og framlag Reykjavíkurborgar

Meginmarkmið með stuðningi Reykjavíkurborgar við Caput tónlistarhóp er að styðja mikilvægan vettvang fyrir flutning samtímatónlistar á Íslandi.

Á samningstímanum skuldbindur Reykjavíkurborg sig til að greiða Caput tónlistarhóp fjárhæðina kr. 2.000.000 árlega á tímabilinu 2021-2023.

Greiðsla framlags skiptist þannig á ári hverju:

kr. 1.000.000 1.-3. hvers eftirtaldrá mánaða, mars og september.

Framlag borgarinnar greiðist inn á bankareikning Caput tónlistarhóps nr. 0334-26-02448.

Framlög Reykjavíkurborgar vegna áráanna 2022 og 2023 eru með fyrirvara um samþykkt fjárhagsáætlunar þeirra ára. Verði gerð umtalsverð breyting til lækkunar á fjárveitingu til samningsins á fjárhagsáætlun taka aðilar upp viðræður um aðlögun samstarfsins að breyttri fjárveitingu.

2. gr. Forsaga, markmið og framlag Caput tónlistarhóps

CAPUT (stofnað 1988) hefur sérstöðu í íslensku tónlistarlífi. Hópurinn er jafnan talinn meðal virtustu flytjenda samtímatónlistar í Evrópu, hefur enda komið fram á mörgum af fremstu tónlistarhátíðum heims, s.s. Holland Festival, Gulbenkian Festival, Warsaw Autumn, Prague Marathon, Santa Cecilia Rome, Bucharest International New Music Week, Toronto New Concert Series, WDR Köln, Takefu Festival í Japan og Beijing Modern Music Festival. Heimspækt erlend tónskáld hafa samið verk sérstaklega fyrir hópinn, þ. á m. Fausto Romitelli, Toshio Hosokawa, Bent Sørensen, Jukka Koskinen, Aldo Clementi og Doina Rotaru, sem og flest íslensk samtímatónskáld. Til dagsins í dag hefur Caput gefið út hátt á þriðja tug geisladiska í Bandaríkjunum, Englandi, Ítalíu, Svíþjóð, Danmörku og á Íslandi og er þá ótalin fjöldi geisladiska þar sem hópurinn kemur fram ásamt öðrum. Meðal útgáfufyrirtækja eru Deutsche Grammophon, Stradivarius, BIS og Smekkleysa. Caput hafa þrisvar sinnum verið tilnefnd til Tónlistarverðlauna Norðurlandaráðs (1995, 1997 og 2005) og árið 2011 voru þeim veitt heiðursverðlaun Norræna tónskáldaráðsins fyrir framúrskarandi listrænt framlag til norrænnar samtímatónlistar.

Markmið Caput hefur frá upphafi (1988) verið að taka virkan þátt í tónleikahaldi á Íslandi og ávallt að kynna nýja íslenska tónlist. Ein grunnástæða fyrir stofnun hópsins var enda sú að á Íslandi yrði til taks sérþjálfaður hópur framúrskarandi hljóðfæraleikara sem annast gæti flutning á krefjandi samtímatónlist og komið fram á tónlistarhátíðum eins og Myrkum músíkdögum, Norrænum músíkdögum, Ung Nordisk Musik, Listahátíð í Reykjavík, Sumartónleikum í Skálholti og sambærilegum viðburðum hérlendis og erlendis. Hópnum berast á hverju ári fjöldi tilboða erlendis frá um tónleikahald og þátttöku í alþjóðlegum hátíðum og verkefnum. Það skiptir sköpum fyrir þátttöku í slíku samstarfi að geta skuldbundið sig nokkur ár fram í tímann enda byggir slík þátttöku, t.d. í evrópskum styrkjaumsóknum, undantekningalaust á kostnaðarþátttöku allra aðila ásamt staðfestu

mótframlagi styrktarsjóða. Caput sér nú fram á kynslóðaskipti. Yngra fólk úr fremstu röð hefur nú þegar hafið störf hjá hópnum. Má þar nefna Björgu Brjánsdóttir flautuleikara og Grím Helgason klarínnettuleikara. Enn fleiri munu koma til starfa á næstu árum og þá er mikilvægt að undirbúa jarðveginn vel því markmið okkar er að skila af sér góðu og samfelldu verki til komandi kynslóðar.

Caput tónlistarhópurinn skuldbindur sig til að annast flutning tónlistar, bæði á tónleikum, upptökum og útgáfu á nýrri íslenskrí tónlist á næstu þremur árum. Meðal annars hefur samningur verið gerður við útgáfufyrirtækið heimspekkta Sono Luminus og gert er ráð fyrir að Caput taki upp einn disk á ári að meðaltali. Tónleikar sem fyrirhugaðir eru á næstu tveimur árum eru m.a. á Myrkum músíkdögum, á Norrænum músíkdögum, í samstarfi við Listahátíð, í samstarfi við Listaháskóla Íslands og með fjölmörgum íslenskum og erlendum samtíma tónskáldum.

3. gr. Ábyrgð

Caput tónlistarhópurinn ber ábyrgð á að starfsemi hópsins fullnægi kröfum um fagmennsku og gæði. Caput tónlistarhópurinn ber ábyrgð á skuldbindingum sem hópurinn eða aðilar á hans vegum stofna til í tengslum við þennan samning. Caput tónlistarhópurinn er með öllu óheimilt að framselja greiðslur samkvæmt samningi þessum til þriðja aðila og setja hann með öðrum hætti til tryggingar fjárskuldbindingu.

4. gr. Kynningarmál

Á öllu kynningarefni Caput tónlistarhópsins hérlendis jafnt sem erlendis, skal koma fram að Caput tónlistarhópurinn sé styrktur af Reykjavíkurborg og skal Caput tónlistarhópurinn birta merki Reykjavíkurborgar á kynningarefni sínu.

5. gr. Samskipti og eftirlit

Skrifstofa menningar- og ferðamálasviðs Reykjavíkurborgar er tengiliður samningsins við Caput tónlistarhópinn. Samráðsfundir samningsaðila skulu haldnir í maí eða júní ár hvert 2021-2023, þar sem farið verður yfir framkvæmd samningsins og tillögur að áherslum Caput tónlistarhópsins fyrir komandi starfsár. Skrifstofustjóri menningarmála skal boða til fundanna. Caput tónlistarhópurinn skal á árlegum fundum leggja fram áætlun um rekstur og starfsemi yfirstandandi árs og árituðum ársreikningi fyrra árs.

6. gr. Vanefndir og meðferð ágreinings

Telji Caput tónlistarhópurinn hættu á að geta ekki uppfyllt samningsbundnar skyldur sínar skal tengilið Reykjavíkurborgar, skrifstofu menningar- og ferðamálasviðs, tilkynnt um það skriflega án tafar. Ef ekki tekst að endurskoða verkefnaáætlun þannig að markmiðum samningsins verði náð, er Reykjavíkurborg heimilt að fella niður greiðslur þar til Caput tónlistarhópurinn hefur sýnt fram á að hann muni standa við samningsbundnar skyldur sínar samkvæmt ákvæðum samningsins, en að öðrum kosti rifta samningnum. Ef sýnt þykir að framlag Reykjavíkurborgar hafi verið notað í öðru skyni en samkvæmt samningi þessum, áskilur Reykjavíkurborg sér rétt til að krefjast endurgreiðslu framlagsins að hluta eða öllu leyti eða rifta samningnum.

7. gr. Gildistími

Samningur þessu er gerður í samræmi við samþykktu fjárhagsáætlun Reykjavíkurborgar 2021 er samþykkt var í borgarstjórn þann 15. desember 2020. Samningurinn gildir til 31. des. 2023. Samningurinn er gerður í tveimur samhljóða eintökum og heldur hvor samningsaðili sinu eintaki.

8. gr. Breytingar á samstarfssamningnum

Samningur þessi er lýsing á samningssambandi aðila, réttindum þeirra og skyldum og gengur framar fyrri skuldbindingum, munnlegum og skriflegum eða öðrum samskiptum. Viðbætur við samning skulu vera skriflegar og undirritaðar af samningsaðilum.

9. gr. Staðfesting og meðferð ágreiningsmála

Samningurinn er gerður með fyrirvara um samþykkt borgarráðs og samþykkt fjárhagsáætlunar Reykjavíkurborgar vegna áraanna 2022 og 2023. Rísi mál út af samningi þessum skal það rekið fyrir Héraðsdómi Reykjavíkur.

Öllu framangreindu til staðfestu rita forsvarsmenn aðila nöfn sín undir samning þennan.

Reykjavík, x. febrúar 2021

F.h. Reykjavíkurborgar

F.h. Caput tónlistarhópsins

Vottar að rétttri dagsetningu og undirskrift: